

御製律呂正義



卷九
之一百

御製律呂正義後編卷之九十九

樂章考七 郊祀

宋三



宋玉清昭應宮樂章

案宋史樂志曰。真宗奉聖祖玉清昭應宮。御製樂章。降聖用真安。奉香用靈安。奉饌用吉安。玉皇位酌獻用慶安。聖祖位酌獻用慶安。太祖位酌獻用慶安。太宗位酌獻用慶安。亞終獻用冲安。飲福用慶安。徹饌用吉安。送聖用真安。凡十一章。

降聖用真安

巍巍真宇。奕奕殊庭。規模太紫。炳煥丹青。元命祇答。大猷是經。多儀有踐。丕應無形。肆設金石。聲聞杳冥。佇迴飈馭。永祐基扃。

奉香用靈安

芳氣上浹。飈馭下臨。紹承丕緒。永勵精明。氤氳成霧。葱鬱垂陰。虔恭對越。介祉攸欽。

奉饌用吉安

發祥有自。介福無疆。紛綸丕應。保祐下方。嘉薦斯備。雅奏具揚。寅威洞達。監眎昭章。

玉皇位酌獻用慶安

無體之體。強名之名。監觀萬寓。統治九清。真期保佑。瑞命昭明。乾乾翼翼。祇答財成。

聖祖位酌獻用慶安

於昭靈貺。誕啓鴻源。功濟庶彙。慶流後昆。蘭肴登俎。桂酒盈尊。俯廻飈駕。永庇雲孫。

太祖位酌獻用慶安

赫赫藝祖。受命高穹。威加海外。化浹區中。發祥宗祏。錫祐眇冲。欽承積德。勵翼精衷。

太宗位酌獻用慶安

明明文考。儲精上蒼。禮樂明備。溥率賓王。功德累洽。歷數會昌。孝思罔極。丕祐無疆。

亞終獻用冲安

太初非有體。至道本無聲。降迹臨下土。成功陟上清。至

仁敦動植。丕緒啓宗祊。紫禁承來格。鴻基保永寧。發祥
垂誕告。致孝薦崇名。廣樂神欽奉。儲休固太平。

飲福用慶安

明明始祖。誕啓慶基。翼翼後嗣。虔奉孝思。精潔斯達。祉
福咸宜。予以報貺。予以受釐。

徹饌用吉安

雕俎在御。鸞駕聞聲。真遊斯降。旨酒斯盈。大樂云闋。大
禮云成。徹彼常薦。罄此明誠。

送聖用真安

精心既達。真遊允臻。禮容斯舉。福應惟醇。將整僊馭。言

還上旻。永存嘉貺。用泰烝民。

宋迎奉聖像樂章

案宋史樂志曰。迎奉聖像。玉皇位。聖祖位。太祖位。太
宗位。竝用慶安。凡四章。

玉皇位用慶安

玉虛上帝。金像眸容。宅真雲構。練日龜從。惟皇對越。率
禮寅恭。靈心丕應。福祿來崇。

聖祖位用慶安

總化在天。保昌厥緒。降格皇闈。瓊輪載御。藻仗星陳。眸
容金鑄。佑我慶基。宅茲靈宇。

太祖位用慶安

烝哉大君。聿懷帝祖。鎔範真儀。奉尊靈宇。至感祥開。洪輝物覩。瞻謁盡恭。飛英率土。

太宗位用慶安

於顯神宗。德洽區中。祥金爍冶。範茲睟容。殊庭胥宇。備物致恭。明威有赫。降福來同。

宋玉清昭應宮上尊號樂章

案宋史樂志曰。玉清昭應宮。上尊號。奉告用隆安。太初殿奉冊寶用登安。二聖殿奉絳紗袍用登安。凡三章。

奉告用隆安

登隆妙號。欽翼淵宗。茂宣德禮。有恪其容。奉璋升薦。垂佩彌恭。揚休詠美。以間笙鏞。

太初殿奉冊寶用登安

皇靈垂祐。洪福彌隆。祇率綿寓。潔祀真容。嚴恭奉冊。對越清躬。睟容肅穆。懿號尊崇。禮盛樂舉。福祿來同。

二聖殿奉絳紗袍用登安

赫赫列聖。盛德巍然。彤彤靈宇。睟儀在焉。奉以龍袞。被之象天。重慶宗稷。億萬斯年。

又昭應宮奉聖號樂章

案宋史樂志曰。太尉奉聖號冊寶用真安。冊寶升殿用大安。降神用真安。奉玉幣用靈安。奉饌用吉安。酌獻用大安。飲福用大安。亞終獻用正安。送神用真安。凡九章。

太尉奉聖號用真安

上旻降監。介祉實繁。邦家修報。妙道歸尊。增名霄極。奉冊靈軒。茂宣聖典。永祐黎元。

寶冊升殿用大安

圖書昭錫。典禮紹成。烝民何幸。教父儲靈。欽承景貺。祇奉崇名。致虔寶冊。垂祐基扃。

降神用真安

猶龍之聖。降生厲鄉。教流清淨。道符混茫。大君肅謁。威儀允臧。森羅羽衛。躬薦蕭薌。簪紱濟濟。鐘石洋洋。高真至止。介福誕祥。

奉玉幣用靈安

琳宮奕奕。黼座煌煌。玉帛成禮。飈馭延祥。鴻儀有則。景福無疆。嘉應昭協。丕猶誕揚。

奉饌用吉安

金奏以諧。飈遊斯格。靈監章明。皇心勵翼。肅奉雕俎。來升綵席。享德有孚。凝禧無斁。

代酌獻用大安

欽崇至道。肅謁殊庭。順風而拜。明德惟馨。飈馭來格。尊酒斯盈。是酌是獻。心通杳冥。

飲福用大安

彼渦之壤。指李之區。千乘萬騎。來朝密都。躬陳芳薦。款接仙輿。飲酒受福。永耀鴻圖。

亞終獻用正安

邈矣道祖。冥幾惚恍。常德不離。至真無象。引位清穹。降祥神壤。酌醴薦誠。控飈來享。

送神用真安

醴醖在戶。金奏在庭。籩豆有踐。黍稷非馨。義盡蠲潔。誠通杳冥。言旋風駟。祚我修齡。

宋太極觀奉冊寶樂章

案宋史樂志曰。真宗太極觀奉冊寶。用登安之曲。凡一章。

奉冊寶用登安

薦號穹冥。登名祖禰。陟配陽郊。協宣典禮。感電靈區。誕聖鴻懿。冊寶斯陳。福祿未暨。

宋景靈宮奉冊寶樂章

案宋史樂志曰。真宗景靈宮奉冊寶。用登安之曲。凡

一章。

奉冊寶用登安

穆穆真宗。錫羨蕃昌。飈輪臨貺。諄誨洞彰。虔崇懿號。祇答景祥。至誠致享。降福無疆。

朱親享景靈宮樂章

案宋史樂志曰。仁宗景祐元年。親享景靈宮。降真用太安。送真用太安。凡二章。

降真用太安

真館奉幣。潔齊致馨。靈因斯格。社稷慶寧。送真用太安

椒漿奠享。珍饌精祈。眸容杳邈。瑤輅霞飛。

大觀朝獻景靈宮樂章

案宋史樂志曰。徽宗大觀三年。朝獻景靈宮。奉饌用吉安。凡二章。

奉饌用吉安

威靈洋洋。靡有常嚮。於惟欽承。來假來饗。博碩芬香。是烝是享。奉器有虔。載德無爽。

爾牲既充。是烹是肆。爾肴既具。是羞是饋。非物之重。惟德之備。神之格思。歆我精意。

建炎郊前朝獻景靈宮樂章

案宋史樂志曰。高宗建炎郊前朝獻景靈宮。皇帝入門用乾安。升殿用乾安。降聖用太安。盥洗用乾安。聖祖位用乾安。聖祖位奉玉幣用靈安。還位用乾安。奉饌用吉安。再盥洗用乾安。再詣聖祖位用乾安。聖祖位酌獻用祖安。還位用乾安。文舞退武舞進用正安。亞終獻用冲安。飲福用報安。還位用乾安。徹饌用吉安。送真用太安。降殿用乾安。望燎用乾安。還大次用乾安。凡二十一章。案聖祖位酌獻祖安一章。高宗御製。寧宗郊前朝獻景靈宮樂章。聖祖位奉玉幣靈安。及聖祖位酌獻祖安。二章。俱注高宗御製見前。而此獨注祖安一章。其靈安一章。或史闕文也。

皇帝入門用乾安

維皇齊居。承神其初。顛顛昂昂。龍步雲趨。景鐘鏗如。肅覲清都。肸鬻之交。神人用孚。

升殿用乾安

帝既臨享。罄茲精意。對越在天。爰升紫陛。孔容翼翼。保承丕緒。孝奉天儀。永錫爾類。

降聖用太安

惟德馨香。升聞八方。粵神臨之。來從帝鄉。萬靈景衛。有

睇其光。監我精純。降福穰穰。

盥洗用乾安

齊居皇皇。瓊琚鏘鏘。承祭之初。其如在旁。挹彼注茲。儲禧迎祥。神之聽之。欣欣樂康。

聖祖位用乾安

涓選休辰。有事嘉薦。琅琅瓊珮。陟降巖殿。其陟伊何。幣玉斯奠。周旋中禮。千億儲羨。

聖祖位奉玉幣用靈安

上靈始祖。雲景元尊。嚴祀夙展。六樂朱軒。明玉之潔。豐帛之溫。暢乃繼序。承德不愆。

還位用乾安

我后臨饗。奠幣攸畢。式旋其趨。桀度有式。禮容齋莊。孝思純實。天休滋至。時萬時億。

奉饌用吉安

百職駿奔。來相于庭。奉盛以告。登茲芳馨。際天蟠地。默運二靈。神兮來歆。祚我休平。

再盥洗用乾安

有嚴大禮。對時休明。情文則粲。蠲潔必清。再臨觀盥。以專以精。真游來格。永觀厥成。

再詣聖祖位用乾安

於赫炎宋。十葉華耀。屬茲郊報。陟降在廟。其降伊何。椒漿桂酒。再拜斟酌。永御九有。

聖祖位酌獻用祖安

瑤源誕啓。玉牒肇榮。覆育羣有。監觀圓清。酒醴既洽。登薦惟誠。無有後艱。駿惠雲仍。

還位用乾安

奠鬯告成。式旋厥位。天步雍容。神人燕喜。九廟觀德。百靈薦祉。子孫其昌。垂千萬祀。

文舞退武舞進用正安

於皇樂舞。進旅退旅。一弛一張。笙磬具舉。豈惟玩聲。象

德是似。神鑒孔昭。福祿來予。

亞終獻用冲安

五音飭奏。神既億康。澹其容與。薦此嘉觴。有來顯相。銷玉鏘鏘。奉承若宥。罔不齊莊。

飲福用報安

嘉薦既終。神貺斯復。賚我思成。靈光下燭。孝孫承之。載祇載肅。敷錫庶民。亟蒙祉福。

還位用乾安

帝臨閔庭。逆釐上靈。神鵠安坐。肅若有承。嘉觴既申。德音惟馨。靈光留俞。祚我億齡。

徹饌用吉安

普淖旣薦。苾芬孔時。神嗜而顧。有來燕娛。饗矣將徹。載欽載祇。展詩以侑。益臻厥熙。

送真用太安

雍歌旣徹。熙事備成。神夕奄虞。忽乘青冥。靈心回睠。監我精禋。誕降嘉祉。休德昭清。

降殿用乾安

我秩元祀。上推靈源。展事有侁。禋威肅然。丹城旣降。秉心益虔。荷天之休。于千萬年。

望燎用乾安

奕奕靈宮。有嚴祀。燔燎具揚。禮儀旣備。帝心肅祇。天步旋止。對越在天。永膺蕃祉。

還大次用乾安

帝將于郊。昭事上祀。爰茲畢觴。復卽于此。飈游載旋。容旌杳騎。維皇嘉承。錫祚昌熾。

建炎明堂前朝獻景靈宮樂章

案宋史樂志曰。高宗建炎明堂前朝獻景靈宮。降聖用大安。升殿用乾安。聖祖位奠玉幣用靈安。奉饌用吉安。聖祖位酌獻用祖安。文舞退武舞進用正安。亞終獻用冲安。飲福用報安。徹饌用吉安。送

真用大安。望燎用乾安。凡十章。案亞終獻沖安一章。用舊辭。攷高宗郊前朝獻景靈宮。亞終獻亦係沖安。或卽用此章也。

降聖用大安

德惟馨香。升聞八方。粵神之從。燦然有光。騶飛乘蒼。啾啾蹒蹒。逍遙從容。顧予不忘。

升殿用乾安

帝旣臨享。龍馭華耀。孝孫承之。陟降在廟。誠意上交。慶陰下冒。天休駢至。千億克紹。

聖祖位奠玉幣用靈安

玉氣如虹。豐繪充筓。旣奉旣將。亦奠在位。有永羣后。實相祀事。何以臨下。心意不貳。

奉饌用吉安

瓊裾鏘鏘。元衣繡裳。薦嘉升香。粢盛芬芳。禮儀莫愆。鼓鐘喤喤。曾孫之常。綏福無疆。

聖祖位酌獻用祖安

裴回若留。靈其有喜。薦我馨香。挹茲酒醴。我祖在天。執道之紀。申佑無疆。奏神稱禮。

文舞退武舞進用正安

進旅退旅。載執干戚。不愆于儀。容服有赫。式安式侑。神

保是格。靈鑒孔昭。孝思維則。

飲福用報安

於赫大神。總司元化。監我純精。威光來下。延昌之貺。千億馮藉。曾孫保之。丕平是迓。

徹饌用吉安

洋洋降臨。肅肅布列。熙事既成。嘉籩告徹。九天儲慶。垂佑無缺。寢明寢昌。綿綿瓜瓞。

送真用太安

高飛安翔。持御陰陽。幽贊圓穹。監觀四方。元精回復。奄虞孔良。畢觴降嘏。偃蹇于驤。

望燎用乾安

奕奕原祠。有嚴恭祀。禮儀孔宣。燔燎斯暨。帝心肅祇。天步旋止。熙事既成。永膺繁祉。

乾道明堂前朝獻景靈宮樂章

案宋史樂志曰。孝宗乾道明堂前朝獻景靈宮。盥洗用乾安。聖祖位用乾安。還位用乾安。奉饌用吉安。再詣盥洗用乾安。再詣聖祖位用乾安。還位用乾安。文舞退武舞進用正安。凡八章。

盥洗用乾安

合宮之饗。報本奉先。欽惟道祖。濬發璿源。駕言謁款。其

盥惟虔。尚監精衷。錫祚綿綿。

聖祖位用乾安

駿命有開。慶基無窮。祇率百辟。仰瞻眸容。鼓鐘斯和。黍稷斯豐。靈其居歆。福祿來崇。

還位用乾安

嘉玉既設。量幣既陳。髣髴靈游。來顧來寧。對越伊何。厥惟一純。佑我熙事。以迄于成。

奉饌用吉安

發祥仙源。流澤萬世。曷其報之。親饗三歲。栢維列卿。潔粢是饋。匪物之尚。誠之為至。

再詣盥洗用乾安

華燈熒煌。瑞烟氤氳。威神如在。蠲潔必親。再盥于罍。再悅于巾。皇心肅祇。其敢憚勤。

再詣聖祖位用乾安

歲逢有年。月旅無射。我將我饗。如幾如式。肅爾臣工。諧爾金石。本原休功。垂裕罔極。

還位用乾安

旨酒思柔。神具醉止。工祝既告。孝孫旋位。何以酢之。純嘏來備。燕及雲來。蕃衍無已。

文舞退武舞進用正安

象德之成。有奕其舞。一弛一張。進旅退旅。嘒以管簫。和以鏞鼓。神其樂康。永錫多祜。

郊前朝獻景靈宮樂章

案宋史樂志曰。寧宗郊前朝獻景靈宮。皇帝入門。用乾安。升殿用乾安。降神用大安。盥洗用乾安。詣聖祖位用乾安。聖祖位奉玉幣用靈安。皇帝還位用乾安。奉饌用吉安。再盥洗用乾安。再詣聖祖位用乾安。聖祖位酌獻用祖安。還位用乾安。文舞退武舞進用正安。亞獻用沖安。終獻用沖安。詣飲福位用乾安。飲福酒用報安。還位用乾安。徹饌用吉

安。送真用太安。降殿用乾安。詣望燎位用乾安。還大次用乾安。凡二十四章。內聖祖位奉玉帛靈安。聖祖位酌獻祖安。宋史樂志俱注高宗御製見前。皇帝入門用乾安。

闕幄邃深。雲景杳冥。天清日晡。展容玉庭。締基發祥。希夷降靈。神其來燕。是饗是聽。

升殿用乾安

帝居瑤圖。璇題玉京。日月經振。列宿上榮。桂簋飶芬。瑚器華晶。寅承禋祀。用戒昭明。

降神用太安 六變

圓鐘為宮

四靈晨曜。五緯夕明。風雲晏和。天地粹清。靈兮來迎。靈兮來迎。啓我子孫。饗于純精。

黃鐘為角

芬枝揚烈。煥珠叶陶。闔珍闡符。展詩舞節。神哉來下。神哉來朝。肅若有承。靈心招搖。

太簇為徵

龍車既奏。鳳馭載翔。帝幄佇靈。天衢騰芳。神來留俞。神來蹇驥。禮鬯樂明。奏假孔將。

姑洗為羽

虹旌霓旄。鸞旗翠蓋。星樞扶輪。月御叶衛。靈至陰陰。靈般裔裔。來格來饗。福流萬世。

盥洗用乾安

禮文有俶。祀事孔明。將以潔告。允惟齊精。自盥而往。聿觀厥成。靈監下臨。天德其清。

詣聖祖位用乾安

維宋有德。欽天顧右。於皇道祖。丕釐靈祐。葛藟殖繁。瓜瓞孕茂。克昌厥後。世世孝奏。

皇帝還位用乾安

桂宮沈沈。藻儀穆穆。天回衮彩。風韶璜玉。咸英皦亮。容

典炳煜。假我上靈。景命有僕。

奉饌用吉安

我簋斯盈。我簠斯實。或剝或烹。或燔或炙。有殺既將。為俎孔碩。禮儀卒度。永錫爾極。

再盥洗用乾安

觴澹初勺。禮戒重盥。假廟以萃。取象于觀。清明外暢。精肅中貫。我儀圖之。三靈攸贊。

再詣聖祖位用乾安

肇基駿命。鞏右鴻業。鼎玉龜符。垂固萬葉。靈貺具臻。神光睒睒。暉祚無疆。規重矩疊。

還位用乾安

皇帝瑞慶。長發其祥。纂系攸遠。溯源靈長。德之克明。休烈有光。配天作極。孝饗是將。

文舞退武舞進用正安

持翟成象。秉朱就列。麾乘整溢。鳳儀諧節。揮舒皇文。歌蹈先烈。合好效懽。福流有截。

亞獻用冲安

光煥紫幄。神流玉房。秉文侑儀。嘉虞貳觴。震澹醉喜。彷彿廸嘗。璇原之休。地久天長。

終獻用冲安

靈輿蹇驥。畢觴泰筵。貳饗允穆。裸將克虔。垂恩儲祉。錫
羨永年。將以慶成。燕及皇天。

詣飲福位用乾安

若木露英。清雲流霞。蔓蔓芝秀。馮馮桂華。綿瑞無疆。產
嘏孔奢。皇則受之。鞏我帝家。

飲福酒用報安

旨酒惟蘭。勺漿惟椒。福流瓚斝。光燭琨瑤。拜貺清宮。凝
輝慶霄。神其如在。徘徊招搖。

還位用乾安

烝哉我皇。繼天毓聖。迎釐元都。對越靈慶。如天斯久。如

日斯盛。瑤圖濬邈。永隆駿命。

徹饌用吉安

房鉶陳列。室簋登奉。告饗具歆。展徹惟拱。祥光奕奕。嘉
氣愾愾。受嘏不訾。燕天之寵。

送真用太安

雲車風馬。靈其來游。天門軼蕩。神其莫留。遺慶陰陰。祉
發祥流。慶我有宋。與天匹休。

降殿用乾安

璇庭爛景。紫殿流光。禮洽乾回。福應日昌。聖系龐鴻。景
命溥將。德茂功成。率祀無疆。

詣望燎位用乾安

厥初生民淵濬惟祖芳薦既徹明燎具舉德馨升聞靈
貺蕃詡懷濡上靈佑周之祐。

還大次用乾安

帝假于宮彝承清祀天暉臨幄宸衛森峙行繇太室旋
趨紫峙率禮不違式剪靈祉。

明堂前朝獻景靈宮樂章

案宋史樂志曰理宗明堂前朝獻景靈宮升殿登
歌用乾安亞獻宮架用冲安凡二章餘用舊辭
升殿登歌用乾安

我享我將罄茲精意陟降左右維天與契齊明乃心祇
肅在位於萬斯年百福來備。

亞獻宮架用冲安

慶雲郁郁鳴璆瑯澹其容與申薦貳觴奉承若宥神
其樂康錫以多祉源深流長。

宋封禪樂章

案宋史樂志曰真宗大中祥符封禪山上園臺降神
用高安。昊天上帝坐酌獻用奉安。太祖配坐酌獻用
封安。太宗配坐酌獻用封安。亞獻用恭安。終獻用順
安。社首壇降神用靖安。皇地祇坐酌獻用禪安。太祖

配坐酌獻用禪安。太宗配坐酌獻用禪安。凡十章。餘同南北郊。

山上園臺降神用高安

巖巖泰山。配德于天。奉符展采。翼翼乾乾。滌濯靜嘉。罔有弗蠲。上帝顧諟。冷風肅然。

昊天上帝坐酌獻用奉安

皇天上帝。陰隲下民。道崇廣覆。化洽鴻鈞。靈文誕錫。寶命惟新。增高欽事。式奉嚴禋。

太祖配坐酌獻用封安

於穆聖祖。肇開鴻業。我武惟揚。皇威有晬。四隩混同。百

靈震疊。陟配高穹。明靈是接。

太宗配坐酌獻用封安

祇若封祀。神宗配天。禮樂明備。奠獻精虔。景靈來格。休祥靄然。於昭垂慶。億萬斯年。

亞獻用恭安

因高定位。禮修物備。薦鬯卜牲。虔恭寅畏。八音克諧。天神咸暨。降福穰穰。永錫爾類。

終獻用順安

浩浩元精。無臭無聲。臨下有赫。得一以清。備物致享。薦茲至誠。泰尊奠獻。夙夜齊明。

社首壇降神用靖安

至哉坤元。資生伊始。博厚稱德。沉潛柔止。降禪方位。聿修明祀。寅恭吉蠲。永錫蕃祉。

皇地祇坐酌獻用禪安

坤德直方。博厚無疆。秉陰得一。靜而有常。寶藏以發。乃育百昌。肅祇禪祭。錫祉穰穰。

太祖配坐酌獻用禪安

皇矣聖祖。丕赫神武。秉運宅中。威加九土。德厚功崇。頌聲載路。陟配方祇。對天之祐。

太宗配坐酌獻用禪安

恭祀柔祇。報功厚載。思文太宗。侑神嚴配。鐘石斯和。籩豆咸在。永錫坤珍。資生為大。

宋汾陰樂章

案通考曰。真宗景德四年正月。遣工部尚書王化基詣汾陰后土祠致祭。又大中祥符四年二月辛酉。具法駕詣睢壇祀后土地祇。備三獻。以太祖太宗並配。悉如封禪之禮。据是汾陰樂章。即其時所作。降神用靖安。奠玉幣。登歌用嘉安。奉俎用豐安。后土地祇坐酌獻用博安。太祖配坐酌獻用博安。太宗配坐酌獻用博安。飲福用博安。亞終獻用正安。后土廟降神用

靖安酌獻用博安。凡十章。

降神用靖安。

茫茫坤載。粵惟太寧。資生光大。品物流形。瞻言汾曲。允宅神靈。聖皇躬享。明德惟馨。

去奠玉幣登歌用嘉安。

至誠旁達。柔祇格思。奉以琮幣。致誠在茲。

樂奉俎用豐安。

博碩者牲。載純其色。體薦登俎。聿崇坤德。

后土地祇坐酌獻用博安。

秉陰成德。敏樹宣功。應變審諦。神力無窮。沉潛剛克。流

謙示中。潔茲奠獻。妙物元通。

太祖配坐酌獻用博安。

坤元茂育。植物成形。於穆聖祖。功齊二靈。嚴恭配侑。厚德攸寧。永懷錫羨。歆此惟馨。

太宗配坐酌獻用博安。

報功厚載。祀事惟明。思文烈考。道濟羣生。侑神定位。協德安平。馨潔並薦。享于克誠。

飲福用博安。

寅威寶命。明祀惟虔。協神備物。罔不吉蠲。后祇格思。靈飈肅然。誕受景福。遐哉億年。

亞終獻用正安

至哉柔祇。滋生蕃錫。滌濯靜嘉。寅恭夕惕。金奏純如。萬舞有奕。立我烝民。莫匪爾極。

后土廟降神用靖安

博厚流形。秉陰成德。柔順利貞。直方維則。明祇格思。素汾之側。祇載吉蠲。宸心翼翼。

酌獻用博安

至哉物祖。設象隆睢。動靜之德。翕闢攸宜。嘉粟以薦。精禱洪釐。茂宣陰貺。五穀蕃滋。

宋祇奉天書樂章

案宋史樂志曰。真宗祥符七年。奉祀畢。天書迴至。應天府。有雲物之瑞。命製是曲。以紀休應。朝元殿酌獻用瑞文。含香園用瑞文。泰山社首壇升降用瑞文。奉香酌獻用瑞安。升降用靈文。凡六章。

朝元殿酌獻用瑞文

妙道非常。神變無方。惟天輔德。靈貺誕章。元文昭錫。寶歷彌昌。禮崇明祀。式薦馨香。

含香園用瑞文

運格熙盛。將封介丘。禮神之域。瑞命殊尤。靈文薦降。不顯皇猷。聖心肅奉。永洽鴻休。

泰山社首壇升降用瑞文

元穹眷懷。寶符申錫。垂露騰文。粲然靈迹。發祥吉圖。純熙寫奕。登薦欽崇。式昭天歷。

奉香酌獻用瑞安

二章

謂天蓋高。惟皇合德。倬彼靈章。圖書是錫。眷命諄諄。被以遐歷。膺籙告成。虔恭欽翼。

地屆興王。祥開圖籙。典禮昭成。祺祥交屬。大輅逶迤。卿雲紛郁。祐我含靈。錫茲介福。

升降用靈文

旻穹無聲。惟德是輔。降監錫符。垂文篆素。孝瑞紀封。英

聲載路。既壽而昌。篤天之祐。

宋祭九鼎樂章

按宋史樂志曰。祭九鼎帝鼐。降神用景安。奉饌用豐安。亞終獻用文安。春分蒼鼎。亞終獻用成安。立夏岡鼎。迎神用凝安。亞終獻用成安。夏至彤鼎。酌獻用成安。立秋阜鼎。酌獻用成安。秋分晶鼎。亞終獻用成安。立冬魁鼎。迎神用凝安。酌獻用成安。冬至寶鼎。奠幣用明安。凡十二章。按漢唐以來。未見設祠九鼎。真宗之祭。殆亦如漢武帝之寶鼎歌。唐元宗之龍池樂章耳。

帝龍降神用景安 土王日記

日號丙丁。方號中央。德惟其時。蠲吉是將。夫何飲之。黃流玉瓚。夫何食之。有陳伊饌。

奉饌用豐安

粢盛既豐。牲牢既充。展茲熙事。溫溫其恭。惟明欣欣。燔炙芬芬。保乎天子。繁祉薦臻。

亞終獻用文安

工祝致辭。黃流協鬯。爰登清歌。載期神享。噫予誠心。精禋是虔。嘉予陳祀。豐盈豆籩。

春分蒼鼎亞終獻用成安

法乾剛兮。鑄鼎奠方。涓嘉旦兮。齋明迎祥。胡爲持幣。維箱及筥。胡爲和羹。有錡維釜。

立夏岡鼎迎神用凝安

我方東南。我日朱明。爰因其時。鼎以岡名。粢盛既馨。牲牲既盈。佑我皇家。巽令風行。

亞終獻用成安

黃流在中。惟馨香祀。於薦于神。爰祇厥事。禮從多儀。以進爲文。尊斝三獻。昭示孔勤。

夏至彤鼎酌獻用成安

犧尊將將。俎基自堂。牲牲肥膋。鼓鐘嗶嗶。肆予醴齊。椒

馨飶香。聿來歆顧。天祚永昌。

立秋阜鼎酌獻用成安

明德崇享。磬筦鏘鏘。鏗兮佩舉。峩冠齊莊。肆陳有序。承箱是將。其牲伊何。籩豆大房。

秋分晶鼎亞終獻用成安

神宮巍巍。庭燎有輝。聲諧脩樂。物陳豐儀。清酏既載。酌言獻之。惟神醉止。聿來蕃釐。

立冬魁鼎迎神用凝安

時運而冬。乃神元冥。陰陽相推。豐年以成。越陳嘉肅。牲牢粢盛。來享來依。監于明誠。

酌獻用成安

罍之初登。其儀昭陳。罍之既裸。其香升聞。神心嘉止。於焉欣欣。貽我有年。穰穰其仁。

冬至寶鼎奠幣用明安

秉心齊明。奉牲博碩。匏絲鏗陳。冠佩儼飾。其肆其將。明神來格。執奠維何。猗歟幣帛。

宋五嶽加帝號祭告樂章

按宋史樂志曰。真宗大中祥符五嶽加帝號祭告。迎神用靜安。冊入門用正安。酌獻東嶽用嘉安。南嶽西嶽北嶽中嶽竝用嘉安。送神用靜安。凡八章。

迎神用靜安

鐘石既作。俎豆在前。雲旗飛揚。神光肅然。當駕颺歛。來乎青圓。言脩縉禮。享茲吉蠲。

冊入門用正安

節彼喬嶽。神明之府。秩秩威儀。肅肅靈宇。懿號克崇。庶物咸覩。帝籍升名。式綏九土。

酌獻東嶽用嘉安

節彼岱宗。有嚴廟貌。惟辟奉天。依神設教。帝典焜煌。嘉薦普淖。至靈格思。殊祥是效。

南嶽用嘉安

作鎮炎夏。畜茲靈光。敷與萬物。既阜既昌。爰刻溫玉。式薦徽章。昭嘏神意。福熙穰穰。

西嶽用嘉安

瞻言太華。奠方作鎮。典冊是膺。等威以峻。上公奉儀。祀宮薦信。介祉萬邦。永配坤順。

北嶽用嘉安

仰止靈嶽。鎮于朔方。增崇懿號。度越彝章。祇薦嘉樂。式陳令芳。永資純佑。國祚蕃昌。

中嶽用嘉安

巖巖神嶽。作鎮中央。肅奉徽冊。尊名孔章。聿降颺駕。載

御製律呂正義 編 卷之六
獻蘭觴。熙事允洽。寶祚彌昌。

送神用靜安

祇薦鴻名。寅威明祀。有楚之儀。如在之祭。奠獻既終。禮容克脩。神鑒孔昭。福禧來暨。

又冊封五嶽帝樂章

按宋史樂志曰。天安殿冊封五嶽帝。冊出入用正安。凡一章。

冊出入用正安

名嶽奠方。帝儀克舉。吉日惟良。九賓咸旅。溫玉鏤文。纁裳正宇。禮脩樂成。篤神之祐。

宋望祭嶽鎮海瀆樂章

按周禮曰。大宗伯之職。國有大故。則旅上帝。及四望。鄭康成謂四望。五嶽四鎮四瀆。文獻通考曰。宋元豐三年。集賢校理陳侗。請依周禮。建四望壇于四郊。詔下詳定禮文。神宗熙寧。望祭嶽鎮海瀆。東望迎神用凝安。升降用同安。奠玉幣用明安。酌獻用成安。送神用凝安。南望迎神用凝安。酌獻用成安。送神用凝安。中望迎神用凝安。酌獻用成安。送神用凝安。西望迎神用凝安。酌獻用成安。送神用凝安。北望迎神用凝安。酌獻用成安。送神用凝安。凡十七章。

東望迎神用凝安

盛德惟木。勾芒御神。沂岱淮海。厥功在民。爰熙壇坎。哀對庶神。于以歆格。靈貽具臻。

升降用同安

紳鞞襜兮。玉珮粲兮。于我將事。神燕喜兮。帝命望祀。敢有不共。往返于位。肅肅雍雍。

奠玉幣用明安

祀以崇德。幣則有儀。肅我將事。登降孔時。精明純潔。罔有弗祇。史辭無愧。神用來娛。

酌獻用成安

肇茲東土。含潤無疆。維時發春。嘉薦令芳。祭用蕤沈。順性含藏。不涸不童。誕降祺祥。

送神用凝安

神之至止。熙壇爲春。神之將歸。旂服振振。歛兮迴飈。宵兮旋雲。祐于東方。永施厥仁。

南望凝神用凝安

嵩嵇衡霍。暨厥海江。時誰長養。惠我南邦。肆嚴牲幣。神式來降。以侑以妥。百福是龐。

酌獻用成安

景風應律。朱鳥開辰。肅肅明祀。嘉籩列陳。牲用牲物。樂

奏蕤賓。克綏永福。祐此下民。

送神用凝安

鼓鐘云云。歛管伊伊。神既醉飽。日送言歸。山有厚藏。水有靈德。物其永依。往奠炎宅。

中望迎神用凝安

維土作德。維帝御行。含養載育。萬物以成。有嚴祀典。薦我德馨。神其歆止。永用億寧。

酌獻用成安

高廣融結。實維中央。宣氣報功。利彼一方。坎壇以祀。六樂鏘鏘。靈其有喜。酌以大璋。

送神用凝安

言旋其處。以定中域。無替厥靈。四方是則。神永不息。祀永不愆。以享以報。于萬斯年。

西望迎神用凝安

品物順說。時司金行。于郊迎氣。以望庶靈。雅歌維樂。主薦維牲。作民之祉。永相厥成。

酌獻用成安

西顛沆碭。執矩司秋。諏言協靈。時祀孔修。禮有薦獻。爰視公侯。秩而祭之。百福是迺。

送神用凝安

我樂我神。簋俎腥饗。日神之還。西土是宮。于蕃禽魚。于衍草木。富我藪隰。滋我高陸。

北望迎神用凝安

帝德乘坎。時御閉藏。爰潔牲醴。兆茲北方。海山攸宅。神施無疆。具享蠲吉。降福孔穰。

酌獻用成安

凄寒凝陰。隕籜滌場。百物順成。黍稷馨香。歎于北郊。爰因其方。何以侑神。薦此嘉觴。

送神用凝安

維山及川。奠宅幽方。我度其靈。降止靡常。肅肅坎壇。既

迎既將。促樂徹俎。是送是望。

紹興祀嶽鎮海瀆樂章

按宋史樂志曰。高宗紹興祀嶽鎮海瀆。東方迎神用凝安。初獻盥洗用同安。奠玉幣用明安。東嶽位酌獻用成安。東鎮位。東海位。東瀆位。亞終獻酌獻竝用成安。送神用凝安。南方迎神用凝安。初獻盥洗升降用同安。奠玉幣用明安。南嶽位酌獻用成安。南鎮位。南海位。南瀆位。亞終獻酌獻竝用成安。送神用凝安。中央迎神用凝安。初獻盥洗升降用同安。奠玉幣用明安。中嶽位酌獻用成安。中鎮位

亞終獻酌獻竝用成安。送神用凝安。西方迎神用凝安。初獻盥洗升降用同安。奠玉幣用明安。西嶽位酌獻用成安。西鎮位。西海位。西瀆位。亞終獻竝用成安。送神用凝安。北方迎神用凝安。初獻盥洗升降用同安。奠玉幣用明安。北嶽位酌獻用成安。北鎮位。北海位。北瀆位。亞終獻竝用成安。送神用凝安。凡四十三章。

東方迎神用凝安

帝奠九壎。孰匪我疆。繫我東土。山川相望。祀事孔時。肅雍不忘。業我濛鴻。郁哉洋洋。

初獻盥洗用同安

青陽肇開。祀事孔飭。鬱人贊漑。其馨苾苾。敬爾威儀。亦孔之則。神之格思。無我有斃。

奠玉幣用明安

司歷告時。惟孟之春。爰舉時祀。旅于有神。鼓鐘既設。珪帛具陳。阜蕃庶物。以福我民。

東嶽位酌獻用成安

巖巖天齊。自古在昔。膚寸之雲。四方其澤。惟時東作。祀事乃飭。惠我無疆。恩霑動植。

東鎮位用成安

惟山有鎮。雄于其方。東孰爲雄。于沂之疆。祀事有時。爰
舉舊章。我望匪遙。庶幾燕饗。

東海位用成安

瀕洞鴻濛。天與無極。導納江漢。節宣南北。順助其功。善
下惟德。我祀孔時。以介景福。

東瀆位用成安

我祀伊何。于彼長淮。導源桐栢。委注蓬萊。扞齊護楚。宣
威示懷。豆籩列陳。亦孔之偕。

亞終獻酌獻用成安

四位並同

我祀孔肅。神其安留。容與裴回。若止若浮。洽此重觴。申

以百羞。無我數遺。萬邦之休。

送神用凝安

蹇兮紛紛。神實戾止。以飲以食。以享以祀。聊兮冥冥。神
亦歸止。以醉以飽。以錫爾祉。

南方迎神用凝安

朱明盛長。我祀用飭。厥祀伊何。山川咸秩。如將見之。繩
繩齊粟。神哉沛兮。消搖來格。

初獻盥洗升降用同安

爰熙嘉壇。揭虔毖祀。鬱人沃盥。贊我裸事。于降于登。以
作以止。莫不肅雍。告靈饗矣。

奠玉幣用明安

我祀我享。儀物孔周。一純斯舉。二精聿修。璞兮其溫。絲兮其紕。是薦潔蠲。神兮安留。

南嶽位酌獻用成安

神曰司天。居南之衡。位焉則帝。于以奠方。南訛秩事。望禮有常。庶幾嘉虞。介福無疆。

南鎮位用成安

維南有山。于彼會稽。作鎮在昔。神則司之。厥有舊典。以祀以時。百味維旨。靈其燕娛。

南海位用成安

維水善下。利物曰功。逶迤百川。誰歟朝宗。蕩蕩大受。於焉會同。管蕭列陳。以答鴻濛。

南瀆位用成安

四瀆之利。經營中國。南曰大江。險今天設。惟爾有神。隴其廟食。望秩孔時。我心翼翼。

亞終獻酌獻用成安

神之游兮。洋洋對越。澹乎容與。肸鬻斯答。乃奏既備。八音攸節。重觴申陳。百禮以洽。

送神用凝安

薦徹豆籩。熙事備成。靈兮將歸。羽旄紛紜。飄其逝矣。浮

空籥雲。悵然顧瞻。有撫懷心。

中央迎神用凝安

天作高山。屹然中峙。經營厥宇。萬億咸遂。火熙土王。爰舉時祀。繩繩宣延。彷彿來止。

初獻盥洗升降用同安

思來感格。肅雍不忘。禮儀既備。濟濟踴踴。潔蠲致敬。往薦其芳。交若有承。神兮孔饗。

奠玉幣用明安

練日有望。高靈來下。何以告誠。心惟物假。有筐斯實。有寶斯藉。於以奠之。神光燭夜。

中嶽位酌獻用成安

與天齊極。伊嵩之高。顯靈効異。神休孔昭。飭我祀事。實俎鸞膋。以侑旨酒。其馨有椒。

中鎮位用成安

禹畫九州。河內曰冀。霍山崇崇。作鎮積勢。我祀如何。百末旨味。承神燕娛。諸神畢至。

亞終獻酌獻用成安

禮樂既成。肅容有常。奄留消搖。申畢重觴。仰臚所求。降福滂洋。師象山則。以况皇章。

送神用凝安

印製律呂正義後

卷七

樂章考七

三

虞至旦兮。靈亦有喜。蹇欲驤兮。象輿已轆。粥音送兮。靈
聿歸矣。長無極兮。錫我以祉。

西方迎神用凝安

有岌斯安。有涵斯洽。聿相厥成。允祀是答。爰飭迺奏。迺
奏既協。於昭降止。是遵是接。

初獻盥洗升降用同安

靡實不新。靡陳不濯。人之弗蠲。矧敢將酌。載晞之悅。載
濡之勺。洗儀告備。陟降時若。

奠玉幣用明安

彼林有賡。彼澤有沈。猗與西望。弗菲弗淫。迺追斯邸。迺

幌斯尋。印禮既卒。是用是歆。

西嶽位酌獻用成安

屹削厥方。風雲斯所。陰邑有宮。血血僕僕。清醑在尊。靈
春在下。于俎獻兮。則莫我吐。

西鎮位用成安

維吳崇崇。于沂之西。瞻彼有隴。赫赫不迷。克禋於嶽。我
酌俶齊。於凡有旅。眡公維躋。

西海位用成安

奄浸坤軸。滋殖其濊。而典斯稽。有陞有墮。弗替時舉。元
聿斯酌。胡先于河。實委之會。

西瀆位用成安

自彼崐虛。于以潛流。念茲誕潤。豈侯不猶。在昔中府。暨海聿修。迄既望止。神保先鹵。

亞終獻用成安

肅肅其乂。既旨既溢。迨其畢酌。偏茲博碩。祀事既遂。不敢諄射。神或醉止。我心斯懌。

送神用凝安

迺羞既徹。迺奏及闋。無餽斯俎。式聽致謁。不蹇不蹶。不沸不決。厲魃其祛。永庇有截。

北方迎神用凝安

我土綿綿。孰匪疆理。惟時幽都。匪曰隄只。滌哉良月。朔風其同。曷阻曷深。其亦來降。

初獻盥洗升降用同安

壽宮輝煌。聿修時祀。續其臨矣。吉蠲以俟。居乎昂昂。行乎遂遂。敬爾攸司。展采錯事。

奠玉幣用明安

相予陰威。厥功浩浩。一歲之功。何以爲報。府有珪幣。我其敢私。肅肅孔懷。于以將之。

北嶽位酌獻用成安

瞻彼芒芒。曰北之常。既高既厚。迺紀迺綱。薦鬯伊始。靈

示孔將。元服鐵駕。覽此下方。

北鎮位用成安

赫赫作鎮。幽朔之垂。兼福我民。食哉具宜。克配彼嶽。有嚴等衰。蠲我灌禮。其敢不祇。

北海位用成安

八裔皆水。此一會同。沄沄天墟。洞蕩洪濛。至哉維坎。不有斯功。所秩伊何。黃流在中。

北瀆位用成安

水星之精。播液發靈。不脅于河。既介以清。翼翼盥薦。椒精芬馨。載止載留。爰弭翠旌。

亞終獻用成安

俎豆紛披。金石繁會。侑以貳尊。匪瀆匪怠。我儀既周。我心孔戒。愴兮容與。彷彿如在。

送神用疑安

靈既醉飽。禮斯徹兮。靈亦樂康。樂斯闕兮。雲征颺舉。不可尼兮。薦福錫祉。曷有極兮。

宋祭海神樂章

案宋史樂志曰。理宗淳祐祭海神。迎神用始安。升降用欽安。東海位奠玉幣用德安。南海位奠玉幣用瀛安。西海位奠玉幣用潤安。北海位奠玉幣用瀚安。捧

俎用豐安。東海位奠酌獻用熙安。南海位酌獻用貴安。西海位酌獻用類安。北海位酌獻用溥安。亞終獻用饗安。送神用成安。凡十六章。案理宗享國四十餘年。凡禮樂之事。式遵舊章。未嘗有所改作。而此祭海神樂章。獨不相沿襲者。毋迺如白虎通所謂。為天下求福報功歟。

迎神用始安

宮一曲

堪輿之間。最鉅惟瀛。包乾括坤。吐日滔星。祀典載新。禮樂孔明。鑒我嘉賴。來燕來迎。

角一曲

四溟廣矣。八紘是紀。我宅東南。迴復萬里。洪濤颺風。安危所倚。祀事特隆。神其戾止。

徵一曲

若稽有唐。克致崇極。祝號既升。爰增祭式。從享于郊。神斯受職。我祀肇新。式祈陰隲。

羽一曲

猗與祀禮。四海會同。靈之來沛。鞭霆馭風。肸鬻彷彿。在位肅雍。佑我烝民。式徼神功。

升降用欽安

靈之來至。垂慶陰陰。靈之已坐。飭茲五音。壇殿聿嚴。陟降孔欽。靈宜安留。鑒我德心。

東海位奠玉幣用德安

百川所歸。天地之左。瀕洞鴻濛。功高善下。行都攸依。百祿是荷。制幣嘉玉。以侑以安。

南海位奠玉幣用瀛安

祝融之位。貴乎三神。吞納江漢。廣大無垠。長爲委輸。祐我黎民。敬陳明享。允鑒恭勤。

西海位奠玉幣用潤安

蒲昌之澤。派引天潢。羲娥出入。浩渺微茫。蓋高斯覆。猶

隔封疆。我思六合。肇正吉昌。

北海位奠玉幣用瀚安

瀚海重潤。地紀亦歸。吞受百瀆。限制北陲。一視同仁。我心則怡。嘉薦玉幣。神其格思。

捧俎用豐安

昭格靈貺。祝典肇升。牲牲告充。雕俎是承。薦虔効物。省德惟馨。靈其有喜。萬宇肅澄。

東海位奠酌獻用熙安

滄溟之德。東南具依。熬波出素。國計攸資。石臼却敵。濟我土師。祀其享錫。益昇燕綏。

南海位酌獻用貴安

南溟浮天。旁通百蠻。風檣迅疾。琛舶來還。民商永賴。坐消寇姦。薦茲嘉觴。彌矣驚瀾。

西海位酌獻用類安

積流疏派。被于流沙。布潤施澤。功均邇遐。我秩祀典。四海一家。祇薦令芳。靈其享嘉。

北海位酌獻用溥安

儵忽會同。裴回安留。牲肥酒香。晨事聿修。惟德之涼。曷奄九州。帝命是祇。多福是求。

亞終獻用饗安

籩豆有楚。貳觴斯旅。神其醉飽。式燕以序。百靈秘怪。蜿蜓飛舞。錫我祺祥。有永終古。

送神用成安

告靈饗矣。錫我嘉祚。乾端坤倪。開豁呈露。元雲聿收。羣龍咸驚。滅除凶災。六幕清豫。

御製律呂正義後編卷之一百

樂章考八 郊祀

宋四

宋祀大火樂章。案通考曰。宋慶歷中。修大火祠。三月九日祠之。位版
 以黑漆朱書。曰大火位。配位曰闕伯位。然是時未有
 樂章。高宗紹興朝。始載祀大火樂章。宣明王。即闕伯。
 居商丘。主大火。降神用高安。升殿用正安。熒惑位奠
 玉幣用嘉安。商丘宣明王位奠幣用嘉安。捧俎用豐
 安。熒惑位酌獻用祐安。宣明王位酌獻用祐安。亞終
 獻用文安。送神用理安。凡十二章。

升員降神用高安

正樂律呂正義

五緯相天。各率其職。司禮與視。則維熒惑。至陽之精。居我長嬴。於以求之。祀事孔明。

黃鐘為角

有出有藏。伏見靡常。相我國家。鑒觀四方。視罔不正。終然允臧。神其來格。明德馨香。

太簇為徵

小大率禮。不愆于儀。展采錯事。秩祀孔時。維今之故。閱我數度。修厥典常。神其來顧。

姑洗為羽

於赫我宋。以火德王。永永不圖。繫神之相。神之來矣。維

其時矣。禮備樂奏。神其知矣。

升殿用正安

有儼其容。有潔其衷。屹屹崇壇。伊神與通。神肯降格。嘉神之休。虔恭降登。神乎安留。

熒惑位奠玉幣用嘉安

馨香接神。肸鬩恍惚。求神以誠。薦誠以物。有藉斯玉。有筐斯幣。是用薦陳。昭茲精意。

商丘宣明王位奠幣用嘉安

熒惑在天。惟火與合。繫神主火。純一不雜。作配熒惑。祀功則然。不腆之幣。予以告虔。

捧俎用豐安

火遵其令。無物不長。視此牲牢。務得其養。豢以祀神。有
腍其肥。非神之宜。其將曷歸。

熒惑位酌獻用祐安

皇念有神。介我戩穀。登時休明。有此美祿。酌言獻之。有
飶其香。神兮燕娛。醉此嘉觴。

宣明王位酌獻用祐安

誰其祀神。知神嗜好。闕伯祀火。爲神所勞。睠言配食。旣
與火俱。於樂旨酒。承神嘉虞。

亞終獻用文安

神旣貺施。嗜我飲食。中以累獻。以承靈億。神方常羊。咸
畢我觴。于再于三。于誠之將。

送神用理安

登降上下。奠璧獻斝。音送粥粥。禮無違者。已虞至旦。神
其將歸。顧我國家。遺以繁釐。

出火祀火辰樂章

案宋史樂志曰。出火祀火辰。降神用高安。升殿用
正安。大辰位奠玉幣用嘉安。商丘宣明王奠幣用
嘉安。捧俎用豐安。大辰位酌獻用祐安。宣明王位
酌獻用祐安。亞終獻用文安。送神用理安。凡十有

二章。

降神用高安

圓鐘為宮

曄曄我宋。火德所昇。用火紀時。允惟象類。神目類歆。誠
繇類至。有感斯通。孚我陽燧。

黃鐘為角

樂音上達。粵惟出虛。火性炎上。亦生於無。我鏞我磬。我
笙我竽。氣同聲應。昭哉合符。

太簇為徵

火在六氣。獨處其兩。感生維君。繫神克相。何以驗之。占

茲垂象。騰駕蒼蚪。歛其來饗。

姑洗為羽

星入於戌。與火俱誦。火出於辰。與星俱伸。一伸一誦。孰
搖縱之。利用出入。民咸用之。

升殿用正安

屹彼嘉壇。赤伏始居。揆光耀明。洋乎如在。俛仰重離。默
與精會。隨我降升。肅聽環珮。

大辰位奠玉幣用嘉安

維莫之春。五陽發舒。日之夕矣。三星在隅。莫量匪幣。莫
嘉匪玉。明薦孔時。神光下矚。

商丘宣明王奠幣用嘉安

二七儲神與天地並孰儷厥德聿惟南正功樹陶唐澤流億姓作配嚴禋贄列惟稱。

捧俎用豐安

有嚴在滌陳彼牲牢孔碩其俎薦此血毛厥初生民飲茹則然以燔以炙伊誰云先。

大辰位酌獻用祐安

孰為大辰維北有斗曾是彗星斯名孔有幽榮報功潔齊敢後容與嘉觴式歆旨酒。

宣明王位酌獻用祐安

周設司燿雖列夏官仍襲孔易闔端實難相彼商丘永懷初造不腆桂椒匪以為報。

亞終獻用文安

潛之伏矣柞櫛既休有俶其來榆柳是求靈駕紛羽尚其安留飲我三爵言言油油。

送神用理安

五運惟火實宗眾陽宿壯用明千載愈光神保聿歸安處火房鬱攸不作炎圖永昌。

納火祀大辰樂章

案宋史樂志曰納火祀大辰降神用高安升殿用

正安。大辰位奠玉幣用嘉安。商丘宣明王位奠幣用嘉安。捧俎用豐安。大辰位酌獻用祐安。宣明王位酌獻用祐安。亞終獻用文安。送神用理安。凡十有二章。

降神用高安

圓鐘為宮

赫赫皇圖。炎炎火德。侈神之賜。奄有方國。粢盛既豐。俎豆有飶。於萬斯年。報祀無斁。

黃鐘為角

火星之躔。有睚其光。表于辰位。伏于戌方。時和歲稔。仁

顯用藏。告爾萬民。出納有常。

太簇為徵

季秋之月。律中無射。農事備收。火功告畢。克禋克祀。有嚴有翼。風馬雲車。尚其來格。

姑洗為羽

明明我后。重祭欽祠。有司肅事。式薦晨儀。禮惟其稱。物惟其時。神之聽之。福祿來為。

升殿用正安

猗與明壇。右平左城。冕服斯臯。玉珮有節。陟降惟寅。匪徐匪疾。式崇大祀。禮文咸秩。

大辰位奠玉幣用嘉安

金行序晚。玉露晨清。齊戒豐潔。肅恭神明。嘉幣惟量。嘉玉惟精。於以奠之。庶幾來聽。

商丘宣明王位奠幣用嘉安

恭惟火正。自陶唐氏。邑于商丘。配食辰祀。有功在民。有德在位。敢替典常。惟恭奉幣。

捧俎用豐安

萬彙攸成。四方寧謐。工祝致告。普存民力。迺薦斯牲。為俎孔碩。介以繁祉。式和民則。

大辰位酌獻用祐安

庶功備矣。休德昭明。天地釀和。鬱鬯斯清。玉瓚以酌。瑤觴載盈。周流常羊。來燕來寧。

宣明王位酌獻用祐安

廣大建祀。式崇其配。馨香在茲。清酒既載。穆穆有暉。洋洋如在。聿懷嘉慶。絜神之賚。

亞終獻用文安

幣玉肅陳。笙簧具舉。桂醕浮觴。瓊羞溢俎。禮有三獻。式和且序。神具醉止。慶流寰宇。

送神用理安

神靈降鑒。天地回旋。惟馨薦矣。既醉歆焉。諸宰斯徹。式

禮莫愆。隕祉降祥。天子萬年。宋祭社稷樂章

案宋史樂志曰。真宗景德祭社稷。降神用靜安。奠玉幣酌獻用嘉安。送神用靜安。凡三章。

降神用靜安

百穀蕃滋。麗乎下土。聿崇明祀。垂之千古。育物惟茂。粒民斯普。報本攸宜。國章咸覩。

奠玉幣酌獻用嘉安

於穆大祀。功利相宣。靈壇美報。歷代昭然。介以蕃祉。祚以豐年。土爰稼穡。允協民天。

送神用靜安

制幣犧齊。正辭無愧。樂以送之。畢其精意。

景祐祀社稷樂章

案宋史樂志曰。仁宗景祐祀社稷。迎神用靈安。初獻升降用正安。太社后土。太稷后稷。奠玉幣並用嘉安。奉俎用豐安。亞終獻用文安。送神用寧安。奉俎用豐安。凡三章。按正安嘉安豐安。辭並同前。亞終獻用文安。亦有目無辭。疑用別祀內樂章也。迎神用靈安

五祀之本。百貨何極。道著開闢。惠周動植。國崇美穀。民

資力穡。奠獻惟寅。神靈來格。

送神用寧安

神之來兮。降茲下土。神之去兮。杳無處所。壇壝肅然。瘞幣徹俎。乃粒之功。冠千萬古。

奉俎用豐安

神州地祇皇地祇與社稷通用

禮崇明禋。惟馨斯酒。潔粢豐盛。殺時特牲。齊莊嚴祇。升燎于禋。其報伊何。如山如阜。

大觀祀社稷樂章

案宋史樂志曰。徽宗大觀祀社稷。迎神用寧安。初獻升降用正安。奠幣用嘉安。酌獻用嘉安。亞終獻

用文安。送神用寧安。凡九章。

迎神用寧安

黃鐘二奏

惟土之尊。民食資焉。陰祀昭格。牲牢腥羶。有功于民。告其吉蠲。神之來享。雲車翩翩。

太簇角二奏

惟穀之神。函育無窮。百嘉蕃殖。民依厥功。嚴飭壇壝。威儀肅雍。神之來享。祈于登豐。

姑洗徵二奏

猗歟那歟。生養斯民。家給人足。時底熙純。祇嚴明禋。於

薦苾芬。粢盛豐潔。神乃有聞。

南呂羽二奏

籩豆斯陳。三牲告幽。報本之禮。答神之休。來歆芬香。豐登于秋。倉箱千萬。治符成周。

初獻升降用正安

崇崇廣壇。嚴恭祀事。威儀孔時。周旋進止。鏘若環珮。誠通于幽。相于農植。邦其咸休。

奠幣用嘉安

於嘻陰祀。封土惟崇。于時之吉。歆予鼓鐘。柔靜化光。人賴其功。陳茲量幣。百貨是隆。

酌獻用嘉安

坤元生物。功利相宣。蠲茲祀事。美報致虔。清酤芬如。靈壇歸然。酌尊奠觴。神其格焉。

亞終獻用文安

薦嘉亶時。洋洋來格。載登茲壇。齊明維敕。神用居歆。順成農穡。其崇若壙。其比如櫛。

送神用寧安

尊壘芬香。威儀肅雍。靈心嘉止。洋洋交通。神歸降禧。年斯屢豐。倉箱千萬。慰予三農。

紹興祀太社太稷樂章

案宋史樂志曰。高宗紹興祀太社太稷。迎神用寧安。盥洗用正安。升壇用正安。太社位奠玉幣用嘉安。太稷位酌獻用嘉安。捧俎用豐安。太社位酌獻用嘉安。太稷位酌獻用嘉安。亞終獻用文安。徹豆用娛安。送神用寧安。望瘞用正安。凡十七章。

迎神用寧安

函鐘爲宮

春社用

五祀之本。社稷有嚴。芟柞伊始。夫敢不虔。吉日惟戊。式薦豆籩。神其來格。用介有年。

函鐘爲宮

秋社臘用

功烈在民。誕受露雨。良耜旣歌。乃揚帟舞。是奉是尊。厚禮斯舉。相其豐年。多稔多黍。

太蔟爲角

是尊是奉。茲率舊章。樂音純繹。薦溢圓方。情文備矣。神其迪嘗。永觀錫羨。多穡穰穰。

姑洗爲徵

穀資土養。民賴穀生。功利之博。莫之與京。式嚴祀壇。因物薦誠。禮具樂奏。惟神顧歆。

南呂爲羽

國主社稷。時祀有常。肅若舊典。報本不忘。粢盛豐潔。歌吟青黃。尊神倏來。百物賓將。

盥洗用正安

祭重齊肅。神格專精。沃洗於阼。涓潔著誠。清明鬯矣。熙事備成。以似以續。如坻如京。

升壇用正安

神地之道。粒食有先。歲謹祈報。禮嚴豆籩。降登裸薦。罔或不虔。以似以續。宜屢豐年。

太社位奠玉幣用嘉安

春秋太社土正后稷通用

土發而祭。農祥是祈。籩豆加篚。典禮有彝。惟茲珪幣。用

告肅祇。神靈降鑒。錫我繁釐。

太社位奠玉幣用嘉安

秋臘太社土正后稷通用

赫赫媪神。稼穡是司。方是藉斂。報本攸宜。嘉壇建祀。玉帛陳儀。明靈昭格。以介蕃釐。

還位用正安

國主太社。地道聿神。稷司百穀。利毓惟均。練日新吉。粢盛苾芬。神燕娛矣。福此下民。

捧俎用豐安

嘉承天和。黍稷翼翼。默相農功。繫神之德。俎實犧牲。舊章是式。嗣有豐年。我庾維億。

太社位酌獻用嘉安

春社太稷土正后稷通用

封土崇祀。有烈在民。千載不昧。福此人羣。洗爵奠斝。有酒其芬。神具醉止。愷樂欣欣。

太社位酌獻用嘉安

秋稷臘太社土正后稷通用

叶氣嘉生。年穀順成。萬億及秭。如坻如京。奉時特牲。告於神明。歌此良耜。於昭德馨。

亞終獻用文安

風雨時若。自天降康。稼穡滋殖。自神發祥。穀我婦子。豐年穰穰。報本嚴祀。齊明允臧。

徹豆用娛安

報本之禮。載于甲令。靈壇昭告。神既來聽。徹彼豆籩。精誠斯罄。實惟豐年。農夫之慶。

送神用寧安

乃粒烝民。功昭萬古。國有常祀。薦獻式叙。肅肅雍雍。舊章咸舉。神保聿歸。介我稷黍。

望瘞用正安

地載萬物。民資迺功。報本稱祀。太稷攸同。禮樂既備。訖埋愈恭。神其降嘏。時和歲豐。

宋祭風師樂章

案宋史樂志曰。神宗熙寧祭風師。迎神用欣安。升降

用欽安。奠幣用容安。亞終獻用雍安。送神用欣安。凡五章。

迎神用欣安

飄颻而來。浙瀝而下。爰張其旂。爰整其駕。有豆有登。有兆有壇。弭旌柅輶。降止且安。

升降用欽安

盥帨于下。有盤有匱。饋酌于上。有登有彝。服容柔止。進退優止。卽事寅恭。神其休止。

奠幣用容安

育我嘉生。神惠是仰。載致斯幣。庶幾用享。鼓之舞之。式

繫爾神。錫爾無疆。佑此下民。

亞終獻用雍安

栗栗壇坫。載是豆觴。醇烈氤氳。普薦芬芳。酌之維宜。獻之維時。民有報侑。靈用安之。

送神用欣安

奠獻紛紛。靈心欣欣。超然而返。衆御如雲。其施伊何。多黍多稌。其祥伊何。不愆厥叙。

大觀察風師樂章

案宋史樂志曰。徽宗大觀察風師。降神用欣安。初獻升降用欽安。奠幣用容安。酌獻用雍安。亞終獻

用雍安。送神用欣安。凡六章。

降神用欣安

羽旗雲車。飄飄自天。猗歟南箕。欣嘉升煙。牲餼粢盛。俎簋鉶籩。維神戾止。從空泠然。

初獻升降用欽安

明昭惟馨。威儀孔時。鏘鏘鳴佩。欽薦牲犧。惟恭惟祇。無愆無違。周旋中禮。肅恭委蛇。

奠幣用容安

吹噓于喁。披拂氤氳。衆竅咸作。潛運化鈞。恩大功豐。酬神惟恭。嘉贈盈箱。于物有容。

酌獻用雍安

犧尊斯陳。清醑盈中。芬芬苾苾。馨香交通。明靈來思。歆我精衷。維千萬祀。品物芘芘。

亞終獻用雍安

清醑洋洋。虔恭注茲。條鬯敷宣。神用歆之。尊罍靜嘉。金奏諧熙。於皇肆祀。休我羣黎。

送神用欣安

窈冥無窮。肸鬻斯融。來終嘉薦。歸返遙空。惟神之歸。欣安導和。惟神之澤。于彼滂沱。

紹興祭風師樂章

案宋史樂志曰。高宗紹興祭風師。迎神用欣安。初獻升降盥洗用欽安。奠幣用容安。酌獻用雍安。亞

迎神用欣安。

夫物細縵。神氣撓之。誰歟其司。維南之箕。俶哉明庶。我祀維時。我心孔勞。神其下來。

初獻升降盥洗用欽安。

神哉沛矣。厥靈載揚。揚靈如何。剡剡皇皇。我其承之。繩繩齊莊。往從鬱人。爰挾斯芳。

奠幣用容安。

物之流形。甚畏瘡癘。八風平矣。嘉生以遂。絲縷之積。有量斯幣。惟本之報。匪物之貴。

酌獻用雍安。

我求於神。無臭無聲。神之燕享。惟時專精。大磬在列。楹燎在庭。侑我桂酒。娛其以聽。

亞終獻用欣安。

禮有三祀。儀物視帝。神臨消搖。疇敢跛倚。重觴載申。百味孔旨。神儀樂康。答我以祉。

送神用欣安。

荃其止乎。禋禋其容。奄橫四海。蹇莫之窮。時不驟得。禮

焉有終。荃其行乎。余心懍懍。

宋祭雨師樂章

案宋史樂志曰。徽宗大觀祭雨師。迎神用欣安。升降用欽安。奠幣用容安。酌獻亞終獻用雍安。送神用欣安。凡五章。

迎神用欣安

神之無象。亦可思索。維雲陰陰。維風莫莫。降止壇宇。來顧芳馨。侑以鼓歌。薦此明誠。

升降用欽安

珮玉璆如。黼黻襜如。承神不懈。訖獲嘉虞。聖皇命祀。臣

敢弗恭。凡爾在位。翼翼雍雍。

奠幣用容安

崇崇壇堦。靈既降止。有嚴執奠。承祀茲始。明靈在天。式顧庶察。澤潤以時。永拂荒札。

酌獻亞終獻用雍安

寅恭我神。惟上之使。俾成康年。民俟休祉。祈俎既登。斟酒既盈。匪薦是專。配以明誠。

送神用欣安

牲俎告徹。嘉樂休成。卒事有嚴。燕虞高靈。蕃我民人。育我稷黍。萬有千祀。承神之祐。

宋祭雨師雷神樂章

案宋史樂志曰。高宗祭雨師雷神。迎神用欣安。初獻盥洗升降用欽安。奠幣用容安。雨師位酌獻用雍安。雷神位酌獻用雍安。亞終獻用欽安。送神用欣安。凡七章。

迎神用欣安

衆萬之託。動之潤之。昭格孔時。維神之依。洽然後先。肆我肯顧。是耶非耶。紛其來下。

初獻盥洗升降用欽安

言言祠宮。爰考我禮。維西有壘。維東有洗。爰潔爰滌。載

薦其醴。神在何斯。匪遠具邇。

奠幣用容安

霈兮隱兮。蹶其陰威。相我有終。胡寧不知。我幣有陳。我邸斯珪。豈惟有陳。于以奠之。

雨師位酌獻用雍安

山川出雲。裔裔而縷。載霆載濛。其德迺溥。自古有年。胡然莫祖。無簡我觴。無怠我俎。

雷神位酌獻用雍安

瞻彼南山。有虺其出。維蟄之奮。維癘之息。眷焉顧饗。在夏之日。觴豆匪報。皇忍忘德。

亞終獻用欽安

作解之德。形聲一兮。爰展獻侑。酌則三兮。我興有假。云胡有私。下土是旨。庶其遠而。

送神用欣安

陰旄載旋。鼓車其鞭。問神安歸。冥然而天。皇有正命。祀事孔蠲。其臨其歸。億萬斯年。

宋享先農樂章

案宋史樂志曰。太宗雍熙享先農。降神用靜安。奠玉幣用敷安。奉俎用豐安。亞獻用正安。終獻用正安。送神用靜安。凡六章。餘同祈穀。

降神用靜安

先農播種。九穀務滋。靈壇致享。良耜陳儀。吉日惟亥。運屬純熙。樂之作矣。神其格思。

奠玉幣用敷安

親耕展祀。明靈來格。九有駿奔。百司庇職。獻奠肅肅。登降翼翼。祈彼豐穰。福流萬國。

奉俎用豐安

肅陳韶舞。祇薦犧牲。乃逆黃俎。以率躬耕。

亞獻用正安

祀惟古典。食乃民天。歆茲潔祀。以應祈年。

式陳芳薦。爰致虔誠。神其降鑒。永福黎甞。

明禋紺壇。靈風肅然。登歌已闕。神馭將旋。道光帝藉。禮備公田。鑒茲躬稼。永錫豐年。

明道親享先農樂章

案宋史樂志曰。仁宗明道親享先農。迎神用靜安。

皇帝升降用隆安。奠玉幣用嘉安。奉俎用豐安。皇帝初獻用禧安。飲福用禧安。退文舞進武舞用正安。亞獻用正安。終獻用正安。送神用靜安。凡十章。

迎神用靜安

稼政之本。民食惟天。甫田兆歲。后稷其先。靈壇既祀。黛耜攸虔。乃聖能享。億萬斯年。

皇帝升降用隆安

冕服在御。壇壝有儀。陟降左右。天惟顯思。

奠玉幣用嘉安

將躬黛耜。先陟靈壇。嘉玉量幣。樂舉禮殫。神既至止。福亦和安。千斯積詠。萬國多歡。

奉俎用豐安

將迎景福。乃薦嘉牲。藉于千畝。用此精誠。

皇帝初獻用禧安

雲疊已實。玉爵有舟。薦于靈藉。佇乃神休。

飲福用禧安

神既至享。福亦來酬。申錫純嘏。旨酒維柔。思文后稷。貽我來牟。子孫千億。丕荷天休。

退文舞進武舞用正安

羽葆有奕。文武交相。周旋合度。福祿無疆。

亞獻用正安

豆籩雖薦。黍稷非馨。惠我豐歲。歆茲至誠。

終獻用正安

歆我嘉薦。錫我蕃禧。多黍多稌。如京如坻。

送神用靜安

獻終豆徹。禮備樂成。祠容肅肅。風馭冥冥。三時務本。一墾躬耕。人祇胥悅。祉福是膺。

景祐享先農樂章

案宋史樂志曰。仁宗景祐享先農。迎神用凝安。升降用同安。奠幣用明安。酌獻用成安。送神用凝安。凡五章。

迎神用凝安

在昔神農。首茲播殖。無有污萊。盡為稼穡。乃粒斯民。實

惟帝力。嘉薦令芳。佇瞻來格。

升降用同安

居德之厚。厥祀攸陳。土膏初脉。農事先春。鏗然金奏。儼若華紳。陟降于阼。福祿惟神。

奠幣用明安

農爲政本。食乃民天。苾芬明祀。薦藜良田。陳茲量幣。望彼豐年。茂介福祉。來欽吉蠲。

酌獻用成安

農祥晨正。平秩東作。倬彼大田。疇乃錢鎛。酒醴盈尊。金璆合樂。期茲萬年。克于六幕。

送神用凝安

務穡之本。恤祀惟馨。神斯至止。降福攸寧。崇茲稼政。合于禮經。俎徹樂闋。邈仰廻靈。

紹興享先農樂章

案宋史樂志曰。高宗紹興享先農。皇帝入內壇盥洗用降安。迎神用靜安。神農后稷位奠幣用嘉安。尚書奉俎用豐安。酌獻用禧安。文舞退武舞進用正安。亞獻用正安。終獻用正安。飲福用禧安。徹豆用歆安。送神用靜安。凡十一章。

皇帝入內壇盥洗用降安

大事在祀。齊潔為先。既盥而升。奉以周旋。下觀而化。無敢不蠲。惟神降格。鑒厥精虔。

迎神用靜安

猗與田祖。粒食之宗。世世仰德。青壇載崇。時惟后稷。躬稼同功。作配並祀。以詔無窮。

神農后稷位奠幣用嘉安

制為量幣。厚意是將。求之以類。各因其方。于以奠之。精誠允彰。神其享止。惠我無疆。

尚書奉俎用豐安

柔毛剛鬣。或剝或烹。為俎孔碩。登薦厥誠。

酌獻用禧安

蠲滌醲竽。巾帨而升。挹彼注茲。酒醴維清。洋洋在上。享于克誠。神其孚佑。以厚民生。

文舞退武舞進用正安

羽毛干戚。張弛則殊。進旅退旅。匪棘匪舒。

亞獻用正安

顯相祀事。濟濟鏘鏘。舉竽酌醴。神其允臧。

終獻用正安

殺核維旅。酒醴維馨。于再于三。禮則有成。

飲福用禧安

幽明位異。施報理同。克恭明神。降福乃豐。我膺受之。來燕來崇。豈伊專享。于彼二農。

徹豆用歆安

莫重于祭。非禮不成。籩豆有踐。爾殽既馨。神具醉止。薦以齊明。贊徹孔時。釐事斯成。

送神用靜安

神之來止。風駛雲翔。神之旋歸。有迎有將。歌以送之。磬筦鏘鏘。何以惠民。豐年穰穰。

紹興祀先農攝事樂章

案宋史樂志曰。高宗紹興祀先農攝事。迎神用凝

安。初獻升殿用同安。盥洗同。奠幣用明安。神農位酌獻用成安。后稷位酌獻用成安。亞終獻用同安。送神用凝安。凡七章。

迎神用凝安

青陽開動。土膏脉起。日練吉亥。為農祈祉。典秩增峻。儀物具美。幄光煥黃。庶幾戾止。

初獻升殿用同安

率職咸蒞。禮容晬然。澡身端意。陟降靡愆。神心嘉虞。享茲潔蠲。敷錫純佑。屢登豐年。

奠幣用明安

靈旂載臨。見光陳贄。有嚴篚實。式將純意。胙饗既接。禮行有次。神兮安留。歆我禋祀。

神農位酌獻用成安

耒耜之教。帝實開先。致養垂利。古今民天。嘉薦報本。于以祈年。誠格和應。神娛福延。

后稷位酌獻用成安

有周應歷。實起后稷。相時神功。率由稼穡。振古稱祀。先農並食。阜我昌我。時萬時億。

亞終獻用同安

旨具百味。酌備三疇。貳觴既畢。禮洽意周。庶幾嘉享。格

神之幽。相我稽事。錫以有秋。

送神用凝安

熙事成兮。始終潔齊。籩豆徹兮。搏節靡垂。靈有嘉兮。降福孔皆。飄然逝兮。我心孔懷。

宋享先蠶樂章

案宋史樂志曰。仁宗景祐享先蠶。迎神用明安。升降用翊安。奠幣用娛安。酌獻用美安。亞終獻用惠安。送神用祥安。凡六章。

迎神用明安

生民之朔。衣皮而羣。惟聖有作。被冒以文。禮樂以成。貴

賤以分。欲報之德。金石諧均。

升降用翊安

掩抑笙簫。鏗馘金石。神來娛娛。嘉我休德。奉祀之臣。洗心翊翊。錫茲福禧。以惠四國。

奠幣用娛安

皇天降物。屢化若神。聖實先識。躬以教民。功被天下。爲萬世文。幣以達志。庶幾徹聞。

酌獻用美安

負哉聖神。功成微妙。迺袞迺裳。以供郊廟。百末旨酒。嘉觴自照。靈徠燕饗。不嘖以笑。

亞終獻用惠安

神之徠。駕踰踰。紫壇熙。燭夜光。會竽瑟。鳴球琅。薦旨酒。雜蘭芳。佑明德。錫百祥。

送神用祥安

神之功兮。四海所宗。占五帝兮。莫與比崇。倏往來兮。旌旗容容。恭明祀兮。萬世無窮。

紹興祀先蠶樂章

案宋史樂志曰。高宗紹興祀先蠶。迎神用明安。初獻盥洗升殿用翊安。降同。奠幣用娛安。酌獻用美安。亞終獻用惠安。送神用祥安。凡六章。

迎神用明安

功被寰宇。儻蟲之靈。有神司之。以生以成。典禮有初。祀事講明。孔蓋翠旌。降集于庭。

初獻盥洗升殿用翊安

靈脩戾止。詔以毛血。既盥而悅。尊爵蠲潔。金石諧宛。登降有節。宜顧宜享。情文不越。

奠幣用娛安

化日初長。時當暮春。蠶事方興。惟后惟嬪。絲纈御冬。殘生濟人。敢忘報本。篚幣是陳。

酌獻用美安

盛服承祀。出自公桑。衣不羽皮。利及萬方。百味旨酒。有飶其香。神其歆止。洋洋在傍。

亞終獻用惠安

日吉良辰。禮備樂作。精誠內孚。俎豆交錯。升歌清越。侑此三爵。黎民不寒。幽顯同樂。

送神用祥安

神之來矣。靈風肅然。云胡不留。歸旄有翩。乃舉舊典。歲以告虔。降福我邦。於萬斯年。

宋親耕藉田樂章

案宋史樂志曰。高宗紹興親耕藉田。皇帝出大次用

乾安。親耕升壇。公卿耕藉。羣官耕藉。降壇歸大次。俱用乾安。凡七章。

皇帝出大次用乾安

勤勞稼穡。必躬必親。爲藉千畝。以教導民。帝出乎震。時維上春。天顏咫尺。望之如雲。

親耕用乾安

元辰旣擇。禮備樂成。洪縻在手。祇飾專精。三推一墮。端冕朱紘。靡辭染屨。以示黎甿。

升壇用乾安

方壇屹立。陛級而登。玉色下照。臨觀耦耕。萬目咸覩。如

日之升。成規成矩。百祿是膺。

公卿耕藉用乾安

羣公顯相。奉事齋莊。率時農夫。舉耜載揚。播厥百穀。以佑我皇。多黍多稌。丕應農祥。

羣官耕藉用乾安

翼翼良耜。我田旣臧。土膏其動。春日載陽。執事有恪。于此中邦。農夫之慶。棲畝餘糧。

降壇用乾安

肇新帝藉。率我農人。三推終畝。祇事咸均。陟降孔時。粲然有文。受天之祐。多稼如雲。

歸大次用乾安

教民稼穡。不令而行。進退有度。琚瑀鏘鳴。言還煩幄。禮則告成。帝命率育。明德惟馨。

宋蜡祭百神樂章

案宋史樂志曰。真宗景德蜡祭百神。降神用高安。奠玉幣酌獻用嘉安。送神用高安。凡三章。

降神用高安

百神蕃阜。四方順成。通其八蜡。合乃嘉平。旨酒斯醇。大庖孔盈。萬靈來格。威儀以成。

奠玉幣酌獻用嘉安

肅肅靈壇。昭昭上天。潔粢豐盛。以享以虔。百神咸萃。六樂斯縣。介茲景福。期于百年。

送神用高安

來顧來享。禮成樂備。靈馭翩翩。雲行雨施。

熙寧蜡祭樂章

案宋史樂志曰。神宗熙寧蜡祭。東西郊降神用熙安。升降用肅安。奠幣用欽安。奉俎用承安。酌獻用懌安。亞終獻用慶安。送神用宣安。南北方迎神用簡安。升降用穆安。奠幣用吉安。酌獻用禋安。亞終獻用曼安。送神用成安。凡十三章。

降神用熙安

天錫康年。四方順成。乃通蜡祭。索享于明。金石四作。羽旄翠旌。神來燕娛。澤被蒼生。

升降用肅安

惟蜡有祭。報神之功。合聚萬物。來享來宗。承詔攝事。不忘肅雍。靈之格思。福祿來崇。

奠幣用欽安

穰穰豐年。繫侯休德。帥承天和。欽象古則。嘉玉量幣。奠容翼翼。靈施暨民。罔有終極。

奉俎用承安

禮崇明祀。必先成民。奉牲以告。備膾其均。炮炙芬芬。俎豆莘莘。錫之純嘏。以佑斯人。

酌獻用懌安

秩秩禮文。爲壇四方。嘉栗旨酒。百神迪嘗。敷與萬物。既阜既昌。伊樂厥福。傳世無疆。

亞終獻用慶安

禮文備矣。肅肅無譁。金石諧節。圭璧光華。粢以告豐。禮以告嘉。錫茲福祉。以澤幽遐。

送神用宣安

靈之來下。擴景乘光。靈之迴御。景龍以驥。鑒我休德。降

嘏產祥。大田多稼。以惠無疆。

南北方迎神用簡安

美若休德。民和歲豐。稼穡雲施。其積如墉。惠我四國。先嗇之功。祭之百種。來享來宗。

升降用穆安

皇皇靈德。經緯萬方。承詔攝事。陟降以莊。高冠岌岌。長佩鏘洋。嘉承神貺。令聞不忘。

奠幣用吉安

於穆明祀。莫如報功。靈之利澤。惠我無窮。齋以滌志。幣以達衷。撫寧四極。永錫登豐。

酌獻用禋安

英英禮文。既備而全。嚴嚴四郊。屹屹紫壇。百末旨酒。其馨若蘭。何以畀民。既壽而安。

亞終獻用曼安

林林生民。含哺而嬉。教之稼穡。實神之爲。圖報厚德。萬祀無期。以假以享。錫我繁禧。

送神用成安

嘉薦芳美。靈來燕娛。旃車結雲。若風馬馳。既至而喜。錫我蕃禧。嘉承天貺。曼壽無期。

大觀蜡祭樂章

案宋史樂志曰。徽宗大觀蜡祭。東郊亞終獻。用慶安。南郊升降。用穆安。凡二章。

東郊亞終獻。用慶安。

震乘春陽。仁司生殖。錫我歲豐。襄我民力。誰其尸之。宗子先嗇。億萬斯年。懷神罔極。

南郊升降。用穆安。

穆如熏風。敷舒文藻。氣蒸消除。豐予黍稻。神之聽之。鐘鼓咸考。於萬斯年。惟皇之報。

紹興以後蜡祭樂章

案宋史樂志曰。高宗紹興以後。蜡祭。東方百神。降

神用熙安。初獻升降。用肅安。大明位奠玉幣。用欽安。帝神農氏位奠幣。用欽安。后稷氏位奠幣。用欽安。奉俎。用承安。大明位酌獻。用擇安。神農位酌獻。用擇安。后稷位酌獻。用擇安。亞終獻。用慶安。送神。用宣安。西方百神。降神。用熙安。初獻升降。用肅安。夜明位奠玉幣。用欽安。神農位奠幣。用欽安。后稷位奠幣。用欽安。奉俎。用承安。夜明位酌獻。用擇安。神農位酌獻。用擇安。亞終獻。用慶安。送神。用宣安。南方百神。迎神。用簡安。初獻盥洗。升降。用穆安。奠幣。用吉安。神農位酌獻。用穆

安。后稷位酌獻用穆安。亞終獻用曼安。送神用成安。北方百神迎神用簡安。初獻盥洗升降用穆安。奠幣用吉安。配位同。神農位酌獻用禋安。后稷位酌獻用禋安。亞終獻用曼安。送神用成安。凡四十二章。

東方百神降神用熙安。

圓鐘為宮

元冥凌厲。歲聿其周。天地閉藏。農且息休。古為蜡禮。伊耆肇脩。爰薦飶馨。以迓颺旂。

黃鐘為角

惟大明尊。實首三辰。功赫庶物。光被廣輪。歲方索享。咸秩羣神。靈旂來下。尸此明禋。

太簇為徵

三時不害。四方順成。酬功報始。以我齊明。豳頌土鼓。樂此嘉平。降祥幅員。惠于函生。

姑洗為羽

日昱乎晝。容光必照。肸蠁之交。惟人所召。有監在下。視茲升燎。肅若其承。雲駢星曜。

初獻升降用肅安

禮儀告具。必儼容莊。工歌屢奏。聲和義章。崇壇陟降。濟

釋之蒸之。爲酒爲醴。推本所由。於焉洽禮。周邦開基。邵
家是啓。獻茲嘉觴。拜下首稽。

亞終獻用慶安

申以貳觴。百末且旨。禮告三終。神具醉止。旌容騎沓。揚
光紛委。降福穰穰。被大豐美。

送神用宣安

禮樂旣成。神保聿歸。言歸何所。地紀天維。豈惟屢豐。嗣
歲所祈。億萬斯年。神來燕娛。

西方百神降神用熙安

本園鐘爲宮

元冬肇祀。始於伊耆。歲事聿成。庸答蕃釐。眷言西顧。匪
神司之。歸功爾神。翩其下來。

黃鐘爲角

魄生自西。照望太陽。下暨諸神。貺施萬方。節適風雨。富
我困箱。恭承嘉祀。惟以廸嘗。

太簇爲徵

神罔小大。奠方茲土。祭列坊墉。禮迨貓虎。有功斯民。祀
乃其所。非稷馨香。厥福周溥。

姑洗爲羽

豐年穰穰。美芳職職。籩豆方圓。其儀孔碩。風馬在御。雲

御製律呂正統後 卷二百
車載飭。來顧來享。惟娛休德。

初獻升降用肅安

盥獻恭莊。燎煙芬醑。載陟載降。禮容可度。欽惟爾神。上下肅肅。成我稷黍。鑒此牲玉。

夜明位奠玉幣用欽安

穆穆太陰。禮嚴妨事。璧玉華光。推以哀對。十二周天。歲乃有終。盡我備物。莫報元功。

神農位奠幣用欽安

耒耜肇興。自神農氏。稼穡滋殖。爲農者始。作配明祀。奠以告虔。萬世佃漁。帝功卓然。

后稷位奠幣用欽安

明明周祖。惟民之恤。播種爲教。下民迺粒。曾是索享。而匪先公。萬物難報。阡陌之功。

奉俎用承安

時和歲登。物忘疾癘。實俎間膏。報神之福。匪神福之。曷成且豐。肥腯咸有。惟神之功。

夜明位酌獻用擇安

除壇西郊。坎其擊鼓。百靈至止。結璘作主。秬鬯湛淡。玉斝觥觥。是謂嘉德。神其安留。

神農位酌獻用擇安

御製律呂正統編 卷一百
三
蕩蕩鴻明。稱秩羣祀。配以昔帝。式重農事。潔我圭瓚。黃
流在中。靈其鑒茲。肸鬻豐融。

后稷位酌獻用擇安

歲十二月。祀有常典。登列司嗇。言反其本。酌彼泰尊。百
末蘭生。承神嘉虞。繫此德馨。

亞終獻用慶安

歌磬臚驩。管蕭激香。飈御奄留。申以貳觴。相與震澹。告
靈其醉。庶幾聽之。成我熙事。

送神用宣安

禮備樂成。澹然將歸。其留消搖。象輿已轆。偃蹇欲驤。羽

毛紛委。忽乘杳冥。遺此福祉。

南方百神迎神用簡安

維物之精。散乎太空。維索之享。合聚而同。迺擊土鼓。于
歲之終。格彼幽矣。肸鬻其通。

初獻盥洗升降用穆安

有悅其新。有匪其潔。言念清祀。弗簡弗褻。誠意既交。品
物斯列。是用告虔。靡神不說。

奠幣用吉安

百室機杼。衣褐具宜。民以卒歲。神實惠之。言舉祀典。答
神之釐。有篚斯陳。振古如茲。

神農位酌獻用穆安

肇降生民。有不粒食。維時神農。迺為先嗇。爾耒爾耜。云誰之因。酌以污尊。我思古人。

后稷位酌獻用穆安

維后之功。配天其大。祀而稷之。萬世如在。黃冠野服。駿奔皇皇。自古有年。神其降康。

亞終獻用曼安

豐年孔多。百禮以洽。匪極神歡。何以昭答。載酌之酒。用申其勤。神具醉止。與物交欣。

送神用成安

卒爵樂闋。禮儀告備。神保聿歸。敢以辭致。順成之方。其蜡乃迺。自今伊始。八方攸同。

北方百神迎神用簡安

蕩蕩闢決。氣清汰寥。彷彿象輿。麗于穹霄。蹇其來下。肅然風飄。神乎安留。於焉消搖。

初獻盥洗升降用穆安

齊誠揭虔。敬恭祀事。維儼之容。維潔之器。雍雍樂成。肅肅禮備。神其燕娛。錫祉庶類。

奠幣用吉安

神宅于幽。呦呦沉沉。至和塞明。考我德音。神聽靜嘉。儼

御製律呂正統後 卷一百
乎若臨。幣以薦誠。敢有弗欽。

神農位酌獻用禋安

先嗇之功。神實稱首。以耜以耒。俶載南畝。列籍皇墳。億世是守。何以爲報。爰潔茲酒。

后稷位酌獻用禋安

煌煌后稷。實配于天。司穡作稼。民以有年。匪神之私。歲以醴告。酌彼泰尊。于德之報。

亞終獻用曼安

蘭生百末。申以貳觴。神具醉止。爛其容光。遺我豐年。萬億及秭。俾民驩康。以洽百禮。

送神用成安

靈之來兮。蚪龍沓沓。下土光景。憑陵闐闐。靈之旋兮。羽衛委蛇。偃蹇高驤。遺此蕃釐。

宋祭文宣王廟樂章

案宋史樂志曰。仁宗景祐祭文宣王廟。迎神用凝安之曲。初獻升降用同安之曲。奠幣用明安之曲。酌獻用成安之曲。飲福用綏安之曲。兗國公配位酌獻用成安之曲。哲宗朝。增送神用凝安之曲。凡七章。案釋奠樂章。肇始於唐。藝祖受命。詔竇儼撰十二安。然皆奏于郊廟。初不及文宣王。意爾時百度草創。孔廟祭

享。猶仍唐舊。至景祐朝。始撰定樂章云。

迎神用凝安

大哉至聖。文教之宗。紀綱王化。丕變民風。常祀有秩。備物有容。神其格思。是仰是崇。

初獻升降用同安

右文興化。憲古師今。明祀有典。吉日惟丁。豐犧在俎。雅奏來庭。周旋陟降。福祉是膺。

奠幣用明安

一王垂法。千古作程。有儀可仰。無德而名。齊以滌志。幣以達誠。禮容合度。黍稷非馨。

酌獻用成安

目天生聖。垂範百王。恪恭明祀。陟降上庠。酌彼醇旨。薦此令芳。三獻成禮。率由舊章。

飲福用綏安

犧象在前。豆籩在列。以享以薦。既芬既潔。禮成樂備。人和神悅。祭則受福。率遵無越。

兗國公配位酌獻用成安

無疆之祀。配侑可宗。事舉以類。與享其從。嘉栗旨酒。登薦惟恭。降此遐福。令儀肅雍。

送神用凝安

御製律呂正統編 卷一百
肅肅庠序。祀事惟明。大哉宣父。將聖多能。歆馨臍饗。迴
馭陵兢。祭容斯畢。百福是膺。

釋奠樂章

案宋史樂志曰。徽宗大觀三年。釋奠。迎神用凝安
之曲。升降用同安之曲。奠幣用明安之曲。酌獻用
成安之曲。配位酌獻用成安之曲。送神用凝安之
曲。凡六章。外大晟府擬撰者。不復採入。蓋云擬撰。
則未經承祀所用耳。

迎神用凝安

仰之彌高。鑽之彌堅。於昭斯文。被于萬年。峩峩膠庠。神

共來止。思報無窮。敢忘于始。

升降用同安

生民以來。道莫與京。溫良恭儉。惟神惟明。我潔尊壘。陳
茲芹藻。言升言旋。式崇斯教。

奠幣用明安

於論鼓鐘。于茲西雍。粢盛肥碩。有顯其容。其容洋洋。咸
瞻像設。幣以達誠。歆我明潔。

酌獻用成安

道德淵源。斯文之宗。功名糠粃。素王之風。碩兮斯牲。芬
兮斯酒。綏我無疆。與天爲久。

禮樂律呂正儀 編 卷二

配位酌獻用成安

儼然冠纓。崇然廟庭。百王承祀。涓辰惟丁。于牲于醑。其從予享。與聖為徒。其德不爽。

送神用凝安

肅莊紳綬。吉蠲牲犧。於皇明祀。薦登惟時。神之來兮。肸鬻之隨。神之去兮。休嘉之貽。

宋釋奠武成王樂章

案宋史樂志曰。仁宗景祐釋奠武成王。迎神用凝安之曲。太尉升降用同安之曲。奠幣用明安之曲。酌獻用成安之曲。飲福用綏安之曲。送神用凝安之曲。凡

六章。宋沿唐舊。故有專祀。後此遂廢。

迎神用凝安

維師尚父。賜履分封。靈神峻密。祀事寅恭。蕭薌祇薦。飴馭排空。如幾如式。福祿來崇。

太尉升降用同安

上公攝事。袞服斯皇。禮容濟濟。佩響鏘鏘。靈旂恍惚。嘉薦令芳。神具醉止。降福穰穰。

奠幣用明安

四嶽之裔。涼彼武王。發揚蹈厲。周室用昌。追封廟食。簡冊增芳。升幣以奠。磬筦鏘鏘。

酌獻用成安

獵渭之陽。理真嘉應。非龍非虎。聿求元聖。平易近民。五月報政。祀典之崇。於斯爲盛。

飲福用綏安

神機經武。降周之寓。表海分封。邁燕超魯。耽耽廟貌。俎豆有序。薦福邦家。維師尚父。

送神用凝安

聖朝稽古。崇茲武經。禮交樂舉。于神之庭。嘉栗旨酒。旣饗芳馨。永嚴列象。劍舄簪纓。

熙寧祀武成王樂章

案宋史樂志曰。神宗熙寧祀武成王。初獻升降用同安之曲。凡一章。

初獻升降用同安

武德洸洸。日靖四方。百王所祀。休有列光。命官攝事。佩玉鏘鏘。思皇多祐。以惠無疆。

大觀祀武成王樂章

案宋史樂志曰。徽宗大觀祀武成王。酌獻用成安之曲。凡一章。

酌獻用成安

涼彼周王。君臣相遇。終謀其成。諸侯來許。洋洋神靈。尊

御製禮典工部編 卷一百
載酒醑。新聲爲侑。笙簫備舉。

紹興釋奠武成王樂章

案宋史樂志曰。高宗紹興釋奠武成王。迎神用凝安之曲。初獻升殿用同安之曲。奠幣用明安之曲。正位酌獻用成安之曲。留侯位酌獻用成安之曲。亞終獻用正安之曲。送神用凝安之曲。凡七章。

迎神用凝安

姑洗爲宮

於赫烈武。光昭古今。載嚴祀事。敕備惟欽。旣潔其牲。旣諧其音。神之格思。來顧來歆。

初獻升殿用同安

肅肅廟中。有嚴階墀。匪棘匪徐。進退可則。冕服是儀。環珮有節。神之鑒觀。率履不越。

奠幣用明安

祀率舊典。禮崇駿功。齊明衷正。肸饗豐融。量幣肅備。周旋鞠躬。神其昭受。幽贊無窮。

正位酌獻用成安

赫赫尚父。時維鷹揚。神潛韜畧。襟抱帝王。談笑致主。竹帛流芳。國有嚴祀。載稽典常。

留侯位酌獻用成安

眷彼留侯。奇籌贊漢。依乘風雲。勒成功旦。克配明禋。儀刑有煥。英氣如生。來格來衍。

亞終獻用正安

道助文德。言為世師。功名不泯。祀事無違。旨酒惟馨。具醉在茲。有嘉累獻。神其燕娛。

送神用凝安

日惟上戊。神顧精純。禮備三獻。樂成七均。奄留洋洋。流福無垠。言還恍惚。空想如存。

宋祀祚德廟樂章

案宋史樂志曰。高宗紹興祀祚德廟。迎神用凝安之

曲。初獻升降用同安之曲。奠幣用明安之曲。疆濟公位酌獻用成安之曲。英畧公位酌獻用成安之曲。啟佑公位酌獻用成安之曲。亞終獻用正安之曲。送神用凝安之曲。凡八章。祚德廟。惟宋垂諸祀典。猶如唐之元元廟。與聖廟耳。

迎神用凝安

姑洗為宮

匿孤立後。惟義惟忠。昔者神考。追錄乃功。祀典載加。進爵錫公。神兮降格。尚鑒褒崇。

初獻升降用同安

廟宇更新。輪奐豐敞。神靈如在。英姿颯爽。執事進趨。升降俯仰。威儀翼翼。虔祈歆饗。

奠幣用明安

牲薦碩大。幣致精純。聿升祀事。茲用兼陳。箱篚既實。奠獻惟寅。饗我至意。福祿來成。

疆濟公位酌獻用成安

以身託孤。實惟死友。撫嫗長之。若父若母。潛授于韓。克與厥後。崇廟以獻。德多報厚。

英畧公位酌獻用成安

立孤固難。死亦匪易。義輕一身。開先趙嗣。肅穆廟貌。烈

有餘氣。式旋嘉薦。昭哉祀事。

啟佑公位酌獻用成安

於皇時宋。永祚有基。始絜覆護。扶而立之。敢忘昭答。牲分酒醴。靈其燕饗。益相本支。

亞終獻用正安

呦呦靈宇。神安且翔。三哲鼎峙。中薦嘉觴。凜若義氣。千載彌光。猗其祐之。錫羨無疆。

送神用凝安

禮樂云備。畢觴爾神。翊翊音送。轆輿若聞。駕言歸兮。靈旂結雲。祚我十億。介福來臻。

御製律呂正義卷一百

